

Na osnovu člana 44. stav (2) Pravila JU Pedagoški zavod Unsko-sanskog kantona, broj: 15-02-6/UO/08. i člana 17. Poslovnika o radu Upravnog odbora JU Pedagoški zavod Unsko-sanskog kantona, broj: 15-02-7/UO/08., 01-02-66/12., 03.1-4/15., 03.1-15/15. i 01-02-60/2022., privremeni Upravni odbor JU Pedagoški zavod Unsko-sanskog kantona, na prijedlog v.d. direktora JU Pedagoški zavod Unsko-sanskog kantona, na 2. sjednici održanoj, dana 21.06.2024. godine, d o n o s i

PRAVILNIK
O PROVOĐENJU SMOTRE SPOSOBNOSTI, ZNANJA,
STVARALAŠTVA I SPORTA
UČENIKA OSNOVNIH I SREDNJIH ŠKOLA
UNSKO-SANSKOG KANTONA

I OPĆE ODREDBE

Član 1.

Smotra sposobnosti, znanja, stvaralaštva i sporta učenika osnovnih i srednjih škola Unsko-sanskog kantona (u daljem tekstu: Smotra) identificira, afirmira i promovira rad učenika, nastavnika, roditelja, odgojno-obrazovnih ustanova, osnivača, lokalne zajednice, nevladinih udruženja i organizacija i svih drugih, posredno ili neposredno uključenih u odgoj i obrazovanje u Unsko-sanskom kantonu.

Član 2.

Pravilnikom o provođenju Smotre sposobnosti, znanja, stvaralaštva i sporta učenika osnovnih i srednjih škola Unsko-sanskog kantona (u daljem tekstu: Pravilnik) obuhvaćeni su sljedeći sadržaji:

- a) Ciljevi Smotre,
- b) Organiziranje i nivoi takmičenja,
- c) Kalendar takmičenja,
- d) Informisanje o Smotri,
- e) Tehnička organizacija takmičenja,
- f) Učesnici takmičenja i zadaci za takmičenje,
- g) Uloga nastavnika/profesora/mentora (u daljem tekstu: nastavnik),
- h) Program i red na takmičenju – žalbe,
- i) Nagrađivanje učenika i nastavnika i Diplome i zahvalnice,
- j) Načini finansiranja takmičenja učenika,
- k) Prijelazne i završne odredbe.

Član 3.

U okviru Smotre provode se takmičenja učenika osnovnih i srednjih škola. Takmičenja učenika, zavisno o vrsti, mogu biti pojedinačna ili ekipna.

II CILJEVI SMOTRE

Član 4.

Ciljevi Smotre su:

- a) evaluacija i unapređenje obrazovnog sistema na području Unsko-sanskog kantona (u daljem tekstu: Kanton),
- b) omogućavanje učenicima da primijene stečena znanja, sposobnosti i vještine iz određenih oblasti te poticanje funkcionalnih znanja,
- c) promocija znanja i sposobnosti učenika,
- d) razvijanje učeničkih potencijala, otkrivanje talentiranih učenika i pružanje mogućnosti da učenici iskažu svoj talenat te steknu nove kompetencije,
- e) razmjena iskustava između škola i uključenje u kulturne i javne aktivnosti u zajednici,
- f) promocija pozitivnih vrijednosti,
- g) upoznavanje i druženje učenika iz različitih škola i sredina,
- h) afirmacija škole iz koje učenik dolazi.

III ORGANIZIRANJE I NIVOI TAKMIČENJA UČENIKA

Član 5.

Smotru organizira i provodi JU Pedagoški zavod Unsko-sanskog kantona (u daljem tekstu: Pedagoški zavod) u saradnji sa osnovnim i srednjim školama Unsko-sanskog kantona, Ministarstvom obrazovanja, nauke, kulture i sporta Unsko-sanskog kantona (u daljem tekstu: Ministarstvo obrazovanja), Sportskim savezom Unsko-sanskog kantona, institucijama vjerskih zajednica, lokalnim zajednicama, nevladinim organizacijama, stručnim organizacijama i drugim institucijama i organizacijama.

Član 6.

- (1) Za provođenje Smotre, za svaku školsku godinu, imenuju se kantonalni organizacioni odbori:
 - a) organizacioni odbor za osnovnu školu,
 - b) organizacioni odbor za srednju školu.
- (2) Kantonalne organizacione odbore, na prijedlog aktiva direktora osnovnih i srednjih škola, u saradnji sa Ministarstvom obrazovanja, Sportskim savezom i drugim relevantnim institucijama, imenuje direktor Pedagoškog zavoda.
- (3) Kantonalne organizacione odbore Smotre čine predstavnici općinskih aktiva direktora (8), predstavnici Pedagoškog zavoda (2), predstavnik Sportskog saveza (1) i predstavnici drugih institucija po potrebi.

Član 7.

Na prvoj sjednici aktiva direktora određuju se škole domaćini završne kantonalne smotre i to:

- škola domaćin iz reda osnovnih škola Unsko-sanskog kantona,
- škola domaćin iz reda srednjih škola Unsko-sanskog kantona.

Član 8.

Takmičenja učenika provode se na više nivoa i to:

- a) školskom nivou,
- b) općinskom/gradskom nivou,
- c) kantonalnom nivou,
- d) federalnom nivou,
- e) državnom i
- f) međunarodnom nivou.

IV KALENDAR TAKMIČENJA

Član 9.

- (1) Školska takmičenja učenika održavaju se prema rasporedu koji odredi škola.
- (2) Program Smotre i kalendar općinskih/gradskih i kantonalnih takmičenja učenika utvrđuje se na prvoj sjednici aktiva direktora.
- (3) Kantonalni organizacioni odbor Smotre, na prvom sastanku, razmatra i usvoja Program Smotre i kalendar takmičenja.
- (4) Programom Smotre određuju se područja takmičenja i broj takmičara koji predstavljaju svaku općinu/grad na kantonalnom takmičenju.
- (5) U kalendaru takmičenja navedeni su termini održavanja općinskih/gradskih takmičenja i termini i mjesta održavanja kantonalnih takmičenja.
- (6) Kalendar takmičenja je javna informacija.
- (7) Program Smotre i kalendar takmičenja Pedagoški zavod objavljuje na svojoj internet stranici.
- (8) Plan i kalendar takmičenja za više nivoe takmičenja učenika od kantonalnog utvrđuju organizatori.

V INFORMISANJE O SMOTRI

Član 10.

- (1) Na prvoj sjednici aktiva direktora, na kojoj se bira Organizacioni odbor, podnosi se informacija o provedenoj Smotri za proteklu godinu.
- (2) Informaciju iz stava (1) ovog člana podnosi direktor Pedagoškog zavoda.
- (3) Kompletna informacija o provedenoj Smotri postavlja se na internet stranici Pedagoškog zavoda.
- (4) Informacija o Smotri, u elektronskoj formi, dostavlja se svim osnovnim i srednjim školama Unsko-sanskog kantona.

Član 11.

Sredstva inormisanja imaju pravo na blagovremenu informaciju o provođenju Smotre, ostvarenim rezultatima i svim okolnostima provođenja Smotre.

VI TEHNIČKA ORGANIZACIJA TAKMIČENJA

Član 12.

Osnovne i srednje škole Unsko-sanskog kantona imaju pravo i obavezu učestvovati na Smotri u skladu sa organizaciono-tehničkim i finansijskim mogućnostima škole.

Član 13.

- (1) Osnovne i srednje škole Unsko-sanskog kantona provode školska takmičenja kao najznačajniji nivo Smotre.
- (2) Program Smotre i Kalendar takmičenja, za školska takmičenja, utvrđuju škole.
- (3) Školska takmičenja se, prema procjeni škole, mogu organizirati i za područja za koja nisu organizirana takmičenja na višim nivoima.
- (4) Škole mogu školska takmičenja iz svih područja koristiti za internu evaluaciju učeničkih postignuća.
- (5) Pravo je svih učenika škole da učestvuju u Smotri.

Član 14.

- (1) Školska takmičenja provode školski organizacioni odbori.
- (2) Školske organizacione odbore imenuje Nastavničko vijeće.
- (3) U odluci o imenovanju navode se poslovi i zadaci članova školskog organizacionog odbora.

Član 15.

- (1) Školski organizacioni odbori imenuju komisije za provođenje školskih takmičenja za svako područje.
- (2) Školski organizacioni odbor je dužan sačiniti cjelovitu informaciju o svim područjima sa školskih takmičenja te istu dostaviti direktoru škole.

Član 16.

Pobjednike školskog takmičenja škola prijavljuje školi domaćinu višeg nivoa takmičenja.

Član 17.

- (1) Općinska/gradska takmičenja provode općinski/gradski organizacioni odbori.
- (2) Općinske/gradske organizacione odbore čine direktori škola sa područja općine/grada.

Član 18.

- (1) Komisije za općinska/gradska takmičenja formiraju se na dan takmičenja iz reda nastavnika učenika koji učestvuju na takmičenju.
- (2) Komisije iz stava (1) ovog člana moraju imati najmanje tri člana.
- (3) Ako se komisija za općinska/gradska takmičenja ne može formirati iz reda nastavnika učenika koji učestvuju na takmičenju (jedan nastavnik predaje isti predmet u više škola) tada član komisije može biti nastavnik srodne grupe predmeta.
- (4) Odluku o formiranju komisije čiji su članovi i nastavnici srodne grupe predmeta donosi direktor škole domaćina općinskog/gradskog takmičenja.

Član 19.

- (1) Kantonalna takmičenja organizira i provodi Pedagoški zavod u saradnji sa kantonalnim organizacionim odborom i školom domaćinom takmičenja.
- (2) Komisije za kantonalna takmičenja formiraju se, na dan takmičenja, iz reda nastavnika učenika koji učestvuju na takmičenju.
- (3) Komisije iz stava (2) ovog člana čine po jedan nastavnik iz svake općine/grada.
- (4) Ukoliko na kantonalnom takmičenju nema nastavnika neke općine/grada Komisija se formira od nastavnika općine/grada koji su prisutni.

VI.1. Učesnici takmičenja

Član 20.

- (1) Redovni učenici osnovnih i srednjih škola mogu učestvovati na takmičenjima učenika pojedinačno ili kao članovi ekipe.
- (2) Jedan učenik se može takmičiti kao pojedinac ili član ekipe u više disciplina.
- (3) Učestvovanje učenika na višim nivoima takmičenjima je dobrovoljno.
- (4) Da bi učenik učestvovao na višem nivou takmičenja mora učestvovati na prethodnom nivou i postići odgovarajući rezultat.
- (5) Ukoliko učenik koji se plasirao na viši nivo takmičenja odustane od takmičenja na višem nivou, na takmičenje se upućuje sljedeći učenik sa rang liste.

Član 21.

- (1) Školska takmičenja organiziraju se za sve učenike škole.
- (2) Napredovanje takmičara na viši nivo takmičenja zavisi o njihovim rezultatima i propozicijama.

Član 22.

- (1) Nakon provođenja školskog takmičenja škole su obavezne školi domaćinu općinskog/gradskog takmičenja, blagovremeno, dostaviti rezultate sa potrebnim podacima i to:
 - a) Ime i prezime učenika odnosno popis članova ekipe,
 - b) naziv škole i mjesto,
 - c) broj osvojenih bodova odnosno plasman u takmičenju,
 - d) ime i prezime predmetnog nastavnika/pratioca učenika ili ekipe.
- (2) Škole domaćini općinskog/gradskog takmičenja dužne su školi domaćinu kantonalnog takmičenja, blagovremeno, dostaviti rezultate sa podacima iz stava (1) ovog člana.

Član 23.

- (1) Poslije održanog kantonalnog takmičenja učenika komisija, u istom danu, obavezno, dostavlja Pedagoškom zavodu tabelarne rezultate iz kojih se vide rezultati takmičenja tj. plasman od prvog do posljednjeg mjesta kao i Zapisnike Komisije o eventualnim žalbama ili sugestijama.
- (2) Tabela iz stava (1) ovog člana sadrži podatke navedene u članu 22. ovog Pravilnika.
- (3) Pedagoški zavod će rezultate iz tabele iz stava (2) ovog člana objaviti na svojoj internet stranici ili facebook stranici Pedagoškog zavoda.

- (4) Škola koja je bila domaćin kantonalnog takmičenja dužna je, u roku od tri dana, od održavanja takmičenja Pedagoškom zavodu dostaviti bilten koji će Pedagoški zavod objaviti na svojoj internet stranici.
- (5) Bilten sadrži podatke o: školi domaćinu takmičenja, učenicima koji su se takmičili na kantonalnom takmičenju, nastavnicima učenika, nazive škola iz kojih su učenici koji su se takmičili, poredak učenika na takmičenju, zadatke i rješenja zadataka koje su učenici rješavali na takmičenju.
- (6) Iz konačnog poretka takmičara ili ekipa Pedagoški zavod će, u skladu s propozicijama, dostaviti imena i prezimena pojedinaca ili nazive ekipa na viši nivo takmičenja.

Član 24.

Pedagoški zavod, nakon provođenja svih nivoa takmičenja, radi Informaciju o smotri za osnovne škole i Informaciju o smotri za srednje škole.

VI.2. Takmičarski zadaci

Član 25.

- (1) Na svakom nivou takmičenja, iz teoretskih nastavnih oblasti, učenici rade test odnosno rješavaju zadatke.
- (2) Vrijeme izrade testa ili zadatka na svim nivoima takmičenja traje 120 minuta.
- (3) Vrijeme iz stava (2) ovog člana može trajati i duže ukoliko to testator procijeni.
- (4) Takmičenja u sportu, stranim jezicima, muzičkoj i likovnoj umjetnosti, tehničkoj kulturi, građanskom obrazovanju za demokraciju i ljudska prava održavaju se prema posebnim pravilima.
- (5) Takmičarske komisije određuju vrijeme potrebno za izvođenje eksperimenta, praktičnih radnih operacija, produkciju i prezentaciju radova.

Član 26.

- (1) Testove, odnosno zadatke, za školska takmičenja pripremaju stručni aktivni nastavnika.
- (2) Testove, odnosno zadatke, za općinska/gradska takmičenja priprema Pedagoški zavod.
- (3) Testove, odnosno zadatke za kantonalna takmičenja priprema i osigurava Pedagoški zavod.
- (4) Za općinska/gradska takmičenja Pedagoški zavod će, na dan održavanja takmičenja, školama domaćinima takmičenja, putem službenog e-maila, dostaviti testove za takmičenja sa naznakom „NE OTVARAJ“, a e-mail će otvarati Komisija za provođenje takmičenja imenovana na dan takmičenja.
- (5) Uz takmičarske zadatke na svim nivoima takmičenja učenika moraju biti data rješenja, odnosno ključ bodovanja učeničkih radova i način rangiranja pojedinih ekipa u takmičenju.

Član 27.

- (1) Na svim nivoima takmičenja učenika, učenici rješavaju zadatke/testove pismeno, usmeno ili izvođenjem eksperimenata ili radnih operacija te umjetničkom produkcijom prezentacijom port-folija i istraživačkih radova.

- (2) Takmičarske komisije za pojedine nivoe takmičenja učenika odgovorne su za tajnost takmičarskih zadataka do početka takmičenja kao i za anonimnost rezultata svih takmičara/ekipa do objave konačnog poretka.
- (3) Pisani učenički radovi sa kantonalnog takmičenja čuvaju se do kraja tekuće školske godine u Pedagoškom zavodu, a drugi radovi kao makete, modeli, post-foliji, likovni radovi i sl. u školi koja je bila domaćin takmičenja, nakon čega se predaju školama iz kojih su učenici, gdje se nagrađeni radovi trajno čuvaju.

VII ULOGA NASTAVNIKA

Član 28.

Uloga nastavnika je da:

- a) pripremaju učenike za pojedine nivoe takmičenja kroz redovnu, dodatnu i izbornu nastavu te slobodne aktivnosti,
- b) učestvuju u radu takmičarskih komisija.

VIII PROGRAM I RED NA TAKMIČENJU UČENIKA

Član 29.

- (1) Takmičarska komisija određenog nivoa takmičenja, u saradnji s tehničkim organizatorom (školom), na dan takmičenja određuje:
 - a) vrijeme početka i završetka rada učenika u rješavanju takmičarskih zadataka,
 - b) raspored prostorija i opreme za takmičenje,
 - c) dežurstvo nastavnika za nadzor rada učenika,
 - d) vrijeme za arbitražu nakon objavljenih preliminarnih rezultata i mogućih prigovora,
 - e) pomoćna sredstva, opremu, pribor i materijal, instrumente i slično kojima se takmičari mogu koristiti za vrijeme rada.
- (2) Tehnički organizator (škola) obavezna je osigurati odgovarajuće učionice, dvoranu, sportske terene, svlačionice, prostorije za komisiju i slično, zavisno o vrsti i specifičnosti takmičenja.

VIII. 1. Rangiranje

Član 30.

- (1) Ako dva ili više učenika, koji su na školskom/općinskom/gradskom/kantonalnom takmičenju osvojili prvo, drugo ili treće mjesto, imaju isti broj bodova obaviće se dodatno provjeravanje za te učenike s ciljem osiguranja jasnog poretka prve tri pozicije.
- (2) Dodatno provjeravanje iz stava (1) ovog člana će se provesti i kada na viši nivo takmičenja ide više od tri učenika radi jasnog poretka učenika koji idu na viši nivo takmičenja.

- (3) Rangiranje ostalih učenika vrši se prema broju osvojenih bodova tako da istu poziciju mogu dijeliti dva ili više učenika.
- (4) Rang listu potpisuju svi članovi komisije.

VIII. 2. Prigovori i žalbe

Član 31.

Škola i pojedinac koji učestvuje u Smotri, ako je nezadovoljan plasmanom ili postoji sumnja u regularnost provođenja procedure, objavljenog rezultata ili bilo kojeg drugog postupka u provođenju Smotre, ima pravo zahtjevati i dobiti na uvid testove i druge materijale.

Član 32.

- (1) Na svim nivoima takmičenja učenika čim se završi takmičenje, kada komisija za pregled preuzme učeničke radove, organizator je dužan na lako dostupnom mjestu učenicima i predstavnicima ekipa, izložiti testove i rješenja da bi svi mogli provjeriti svoj rad.
- (2) Poslije saopštenja konačnih rezultata, učesnik takmičenja ili ovlašteni predstavnik, ako smatraju da određeni rad zaslužuje više ili manje bodova, imaju pravo na prigovor odnosno žalbu.
- (3) Prigovor i žalba prosljeđuju se komisiji za žalbe koju čine tri člana – jedan predstavnik iz Pedagoškog zavoda i dva nastavnika koja nisu bili članovi komisije za pregled.
- (4) Komisija iz stava (3) dužna je prigovore i žalbe razmotriti i konkonzusom riješiti u roku od jednog sata, ako je u mogućnosti.
- (5) Ako se prilikom razmatranja prigovora ili žalbe ne postigne konkonzus o istim se odlučuje većinom glasova svih članova komisije.
- (6) O rješavanju po prigovoru ili žalbi vodi se zapisnik kojeg potpisuju svi članovi komisije.
- (7) Odluka komisije je konačna.

IX NAGRAĐIVANJE UČENIKA I NASTAVNIKA I DIPLOME I ZAHVALNICE

Član 33.

- (1) Pedagoški zavod, u skladu sa raspoloživim finansijskim sredstvima (odobrenim u Budžetu Unsko-sanskog kantona), osigurava nagrade za najuspješnije učenike u osnovnim i srednjim školama.
- (2) U skladu sa raspoloživim finansijskim sredstvima (odobrenim u Budžetu Unsko-sanskog kantona) Pedagoški zavod će učenicima dodijeliti novčane nagrade utvrđene sljedećim tabelama:

KANTONALNI NIVO

R/B	OSVOJENO MJESTO	POJEDINAČNO	EKIPNO
1.	I	350 KM	400 KM (po ekipi)
2.	II	300 KM	350 KM (po ekipi)
3.	III	250 KM	300 KM (po ekipi)

FEDERALNI NIVO

R/B	OSVOJENO MJESTO	POJEDINAČNO	EKIPNO
1.	I	500 KM	650 KM (po ekipi)
2.	II	450 KM	600 KM (po ekipi)
3.	III	400 KM	550 KM (po ekipi)

DRŽAVNI NIVO

R/B	OSVOJENO MJESTO	POJEDINAČNO	EKIPNO
1.	I	600 KM	700 KM (po ekipi)
2.	II	550 KM	650 KM (po ekipi)
3.	III	500 KM	600 KM (po ekipi)

MEĐUNARODNI NIVO

R/B	OSVOJENO MJESTO	POJEDINAČNO	EKIPNO
1.	I	700 KM	750 KM (po ekipi)
2.	II	650 KM	700 KM (po ekipi)
3.	III	600 KM	650 KM (po ekipi)

Član 34.

Novčane nagrade iz člana 33. ovog Pravilnika isplaćivat će se na osnovu odluka koje donosi direktor Pedagoškog zavoda.

Član 35.

(Novčane nagrade za nastavnike)

- (1) Pedagoški zavod, u skladu sa raspoloživom finansijskim sredstvima (odobrenim u Budžetu Unsko-sanskog kantona), osigurava nagrade za najuspješnije nastavnike u osnovnim i srednjim školama.
- (2) U skladu sa raspoloživim finansijskim sredstvima (odobrenim u Budžetu Unsko-sanskog kantona) Pedagoški zavod će nastavnicima dodijeliti novčane nagrade propisane važećim Kolektivnim ugovorima za osnovno i srednje obrazovanja Unsko-sanskog kantona (u daljem tekstu: Kolektivni ugovori).
- (3) Nastavnici iz stava (1) ovog člana imaju pravo na jednu novčanu nagradu ako su sa istim učenicom ili učenicima osvojili 1., 2. i 3. mjesto na kantonalnom, federalnom, državnom i međunarodnom nivou, a isplaćuje se najviši iznos jednokratne nagrade utvrđene u kolektivnim ugovorima.
- (4) Pravo na isplatu nagrade ostvarit će se po svakom predmetu po jednom, za radnika najpovoljnijem osnovu.
- (5) Novčane nagrade obezbjeđuju se iz sredstava planiranih u finansijskom planu Pedagoškog zavoda, a isplaćuje ih Pedagoški zavod na prijedlog direktora škole.
- (6) Novčane nagrade iz stava (2) ovog člana isplaćivat će se na osnovu odluka koje donosi direktor Pedagoškog zavoda.

Član 36.

- (1) Učenicima koji su osvojili prva tri mjesta na kantonalnim takmičenjima dodjeljuju se diplome.
- (2) Nastavnicima učenika kojima su dodijeljene diplome na kantonalnim takmičenjima dodjeljuju se zahvalnice.
- (3) Diplome se dodjeljuju i školama koje su u ekipnom dijelu takmičenja osvojile prva tri mjesta.
- (4) Diplome i zahvalnice, u ime organizatora, potpisuje direktor Pedagoškog zavoda ili lice koje on ovlasti.
- (5) Diplome/zahvalnice pobjednicima općinskih/gradskih takmičenja dodjeljuje škola domaćin završne smotre na općinskom/gradskom nivou takmičenja.

Član 37.

Učešće i rezultati učenika, nastavnika i škola na Smotri ulaze u ocjenu ukupne uspješnosti učenika, nastavnika i škole na način i u mjeri kako je to propisano pravilnicima koji se odnose na napredovanje učenika, nastavnika i škola i koje donosi ministar Ministarstva obrazovanja, nauke, kulture i sporta Unsko-sanskog kantona.

X FINANSIRANJE TAKMIČENJA UČENIKA

Član 38.

- (1) Sredstva za provođenje školskih takmičenja učenika osigurava škola odnosno organizator.
- (2) Sredstva za provođenje općinskih/gradskih takmičenja učenika snose općinski organizacioni odbori u saradnji sa školama, lokalnom zajednicom i drugim zainteresiranim institucijama i organizacijama.
- (3) Troškove izrade testova za općinska/gradska takmičenja snosi Pedagoški zavod.
- (4) Troškove za provođenje kantonalnih takmičenja učenika snosi Pedagoški zavod u skladu s raspoloživim sredstvima odobrenim u budžetu za tu namjenu.
- (5) Troškovi kantonalnih takmičenja obuhvataju:
 - a) troškove izrade testova za kantonalna takmičenja,
 - b) troškove prijevoza takmičara i njihovih mentora,
 - c) izradu diploma i zahvalnica,
 - d) troškove organizacije završne smotre na kantonalnom nivou za osnovne škole,
 - e) troškove organizacije završne smotre na kantonalnom nivou za srednje škole
 - f) ostale troškove organizacije kantonalnih takmičenja.

Član 39.

- (1) Sredstva za takmičare ili ekipe na federalnom, državnom ili međunarodnom nivou takmičenja učenika osigurava Pedagoški zavod u skladu s raspoloživim sredstvima odobrenim u budžetu za tu namjenu.
- (2) Sredstva za troškove takmičenja za više nivoe od kantonalnog obuhvataju:
 - a) troškove prijevoza i smještaja takmičara i njihovih mentora,
 - b) materijalne troškove.

XI PRIJELAZNE I ZAVRŠNE ODREDBE

Član 40.

Izmjene i dopune ovog pravilnika vršit će se na način i po postupku za njegovo donošenje.

Član 41.

- (1) Ovaj pravilnik stupa na snagu danom donošenja.
- (2) Stupanjem na snagu ovog Pravilnika prestaje da važi Pravilnik smotre sposobnosti, znanja, stvaralaštva i sporta učenika osnovnih i srednjih škola Unsko-sanskog kantona, broj: 02.4-32/19. od 28.11.2019.godine.

Broj: 01-02-16/2024.

Datum: 21.06.2024.god.

**Predsjednik privremenog
Upravnog odbora**

Teufik Žalić